

Dogri Evening (NSD)

15-07-2026

खबरां

1. भारत-ब्रिटेन व्यापक आर्थिक ते बपार समझौता अज्ज थमां लागू होई गेआ ऐ।
2. वाणिज्य ते उद्योग मंत्री पीयूष गोयल होरें भरोसा दित्ता ऐ जे समझौते दे तैहत डेयरी उत्पाद, सब्जियें ते खाने च इस्तेमाल तेल सने संवेदनशील कृषि पदार्थ पूरी चाल्ली सुरक्षित ना।
3. राष्ट्रपति द्रोपदी मुर्मू होरें जन कल्याण आस्तै आयुर्वेद च आधुनिक तकनीकें गी अपनाने दा आग्रह कीता ऐ।
4. भारत दा संयुक्त राष्ट्र सुरक्षा परिषद च सुधार दा आह्वान, सचेत कीता जे सुधार नेई होने पर विश्व भरै च एहदे प्रति लोकें दा भरोसा बढोग।
5. ओडिशा च अज्ज भारी बरखा दा रेड अलर्ट।
6. फीफा विश्व कप च मौजूदा चैंपियन अर्जेंटीना दा अज्ज रातीं सेमीफाइनल च इंगलैंड कन्नै मुकाबला।

<><><><><><>

PM-CETA

प्रधानमंत्री नरेंद्र मोदी होरें आखेआ ऐ जे अज्ज नमां लागू होए दा व्यापक आर्थिक ते बपार समझौता ते सामाजिक सुरक्षा समझौता भारत ब्रिटेन दे भ्याली च इक महत्वै आह्ला क्षण ऐ। श्री मोदी होरें केंद्री वाणिज्य ते उद्योग मंत्री हुंदी इक सोशल मीडिया पोस्ट गी सांझा करदे होई एहू गल्ल आक्खी। प्रधानमंत्री होरें आखेआ जे समझौता भारत दे करसानें उद्यमियें ते भलेआं लौहके, लौहके ते दरम्याने उद्योगें गी नमीं गति प्रदान करोग। कन्नै गै महत्वपूर्ण क्षेत्रें गी ब्रिटेन दे बजार तगर मजबूत पुज्ज प्राप्त करने च मदद करोग। प्रधानमंत्री होरें आखेआ जे एहदे कन्नै प्रौद्योगिकी, पेशेवर सेवाएं ते नवाचार दे क्षेत्र च सहयोग बी मजबूत होग। एहदे कन्नै कुशल भारती प्रतिभाएं दी आओजाई गी बी बढावा मिलग। श्री मोदी होरें आखेआ जे सामाजिक सुरक्षा समझौता ब्रिटेन च अस्थाई रूपै च कम्म करा'रदे भारती पेशेवरें गी अनमुल्ली सहायता प्रदान करग। प्रधानमंत्री होरें आखेआ जे भारत ते ब्रिटेन सांझा समृद्धि आस्तै मिलियै कम्म करना जारी रक्खडन।

Goyal-CETA

भारत-ब्रिटेन मुक्त बपार समझौते दे अज्जै थमां लागू होने पर वाणिज्य ते उद्योग मंत्री पीयूष गोयल होरें आखेआ ऐ जे एहू समझौता बपार, निवेश ते नवाचार आस्तै नमें मौके खोलगा। इक अंग्रेजी दैनिक च लिखे दे लेख च गोयल होरें आखेआ जे मुख बपार समझौता कारोबारियें आस्तै विशेष मौके पैदा करगा। कन्नै विकसित भारत 2047 दे प्रधानमंत्री नरेंद्र मोदी हुंदे दृष्टिकोण गी होर गति देगा। उनें आखेआ जे महत्वकांक्षी समझौता समाज दे हर वर्ग गी सशक्त बनागा। उनें आखेआ जे इस समझौते दा फायदा ना शङ्क निर्यातकें गी होग, सगुआं बक्ख-बक्ख कौशल स्तर दी सेवा क्षेत्र च लग्गे दे पेशेवरें गी बी लाहू मिलगा। गोयल होरें मेद दस्सी जे एहूदे कन्नै 75 जहार थमां मते भारती पेशेवरें ते 900 थमां मती कंपनियें गी लाहू मिलने दी मेद ऐ। उनें एहू बी जकीन दित्ता जे समझौता डेयरी, सब्जियें, सेब, खने आले तेज, ओट्स, बाजरा ते दुए खाद्य पदार्थें गी संवेदनशील सूची रक्खोग ते इनें चीजें पर ब्रिटेन गी शुल्क च कोई छूट नेई दित्ती जाहगा।

<><><><><><>

DM-CETA

रक्षा मंत्री राजनाथ सिंह होरें आखेआ ऐ जे भारत-ब्रिटेन बपार समझौता भारत दी आर्थिक वृद्धि ते वैश्विक सांझेदारी गी मजबूत करने दी दिशा च इक महत्वपूर्ण गैं ऐ। उपभोक्ता मामलें दे मंत्री प्रहलाद जोशी होरें आखेआ जे भारत-ब्रिटेन व्यापक आर्थिक ते बपार समझौता इक महत्वपूर्ण कदम ऐ जेड़ा देश दे आर्थिक हितें गी मजबूत करग ते करसानें ते कृषि क्षेत्र दी राखी करोग।

<><><><><><>

Industry-Bodies CETA

उद्योग जगत नै भारत-ब्रिटेन व्यापक आर्थिक ते बपार समझौते गी भारत दे मुक्त बपार समझौते दी जात्तरा च इक ऐतिहासिक मील दा पत्थर दस्सेआ ऐ। फिक्की दे महासचिव अनंत स्वरूप होरें आखेआ जे एहू समझौता वैश्विक मुल्य श्रृंखला च भारत दी भागीदारी गी बढ़ावा देगा। स्वरूप होरें भारत-ब्रिटेन व्यापक आर्थिक ते बपार समझौता लागू होने पर प्रधानमंत्री नरेंद्र मोदी होरें गी बधाई दित्ती ऐ। एसोचैम दे अध्यक्ष निर्मल कुमार मिंडा होरें समझौते गी भारत दे मुक्त बपार समझौते दी जात्तरा इक मील दा पत्थर दस्सेआ।

<><><><><><>

Prez. Ayurveda

राष्ट्रपति द्रोपदी मुर्मू होरें समाज दे व्यापक हितें आस्तै आयुर्वेद च आधुनिक तकनीकें गी अपनाने दा आह्वान कीता ऐ। अज्ज नमीं दिल्ली च सोश्रुतम 2026 दे उद्घाटन समारोह गी संबोधित करदे होई राष्ट्रपति होरें आखेआ जे केंद्र सरकार नै आयुर्वेद ते पोग गी वैश्विक मंच पर नमीं उर्जा कन्नै स्थापित कीता ऐ। उनें संतोख प्रगट कीता जे आयुर्वेदिक सर्जरी जेही पुरानी परम्परा गी विज्ञानक मानकें पर स्थापित करने दा प्रयास कीता जा करदा ऐ।

<><><><><><>

Cabinet

केंद्री मंत्रिमंडल नै अज्ज उत्तर प्रदेश च राष्ट्री राजमार्ग-19 ते वाराणसी रिंग रोड दे बश्कार 46 किलोमीटर थमां मते लम्में 6 लाइन आहले ग्रीन फील्ड एलिवेटेड कारिडोर गी हाईब्रिड वार्षिक माडल पर मंजूरी देई दित्ती जेदे च शैहरी आओजाई च सुधार होगं अज्ज नमीं दिल्ली च मीडिया गी जानकारी दिंदे होई सूचना ते प्रसारण मंत्री अश्विनी वैश्वणव होरें दस्सेआ जे परियोजना दी कुल लागत 14 ज्हार 400 करोड़ रपे थमां मती ऐ ते एह्दे कन्नै राष्ट्री राजमार्ग 19 ते वाराणसी शैहर दे बश्कार बिना रोक-टोक संपर्क स्थापित होग। मंत्रिमंडल नै वाराणसी शैहर च ट्रैफिक जाम गी घट्ट करने आस्तै वरूणा नदी दे कंडे जरनैली शिड़क 31 ते वाराणसी रिंग रोड गी जोड़ने आहले 43 किलोमीटर थमां 6 ते 4 लेन आहले एलिवेटेड कारिडोर दे विकास गी बी मंजूरी दित्ती ऐ। इस परियोजना दी कुल लागत 10 ज्हार 997 करोड़ रपे थमां मती ऐ। वैश्वणव होरें दस्सेआ जे मंत्रिमंडल नै भारत दे सेमीकंडक्टर डिजाइन ते निर्माण तंत्र गी मजबूत करने आस्तै 1 लक्ख 27 ज्हार 500 करोड़ रपे बजट कन्नै सेमीकंडक्टर 2.0 परियोजना गी मंजूरी दित्ती ऐ।

<><><><><><>

Skill-India Mission Anniversary

अज्ज स्किल इंडिया मिशन दी 11मीं बरेगंड मनाई जा करदी ऐ। प्रधानमंत्री नरेंद्र मोदी होरें 2015 च इस मिशन दी शुरूआत कीती ही जेदा उद्देश्य नौजवानें गी रोजगार, उद्योग ते कारोबार ते रोजी-रूट्डी कमाने दे मौके पैदा करना ऐ। स्किल इंडिया मिशन नै लक्खें युवाएं गी उद्योग सरबन्धी कौशल प्रदान करियै रोजगार, उद्यमिता ते राष्ट्र निर्माण दे मौके पैदा कीते न। कौशल विकास ते उद्यमिता मंत्रालय नै अपनी बक्ख-बक्ख योजनाएं दे माध्यम कन्नै 6 करोड़ थमां मते युवाएं गी सशक्त बनाया ऐ। स्किल इंडिया मिशन तैहत हर बरे इक करोड़ थमां मते नौजवानें गी सिखलाई दितती जा करदी ऐ।

<><><><><><>

LS-Speaker

लोकसभा अध्यक्ष ओम बिरला होरें आखेआ ऐ जे सदन च हंगामे कन्नै नेई सगुआं सार्थक बहस ते तर्कपूर्ण चर्चा कन्नै जनप्रतिनिधि अपनी पंछान बनांदे ना। ओहू अज्ज राजस्थान विधानसभा च 75में स्थापना बरे दे सरबंघै च आयोजित अमृत महोत्सव दे तैहत विधायी गौरव जात्तरा कार्यक्रम दे उद्घाटन सत्र गी संबोधित करा'रदे हे। उनें आखेआ जे राजस्थान च लोकतांत्रिक संवाद ते विचार विमर्श दी समृद्ध रिवायत रेई ऐ।

<><><><><><>

POJK-Protest

पाकिस्तान दे नजैज कब्जे आहले जम्मू-कश्मीर च बरोध-प्रदर्शन अज्ज लगातार 36में रोज बी जारी ऐ। रैली गी संबोधित करदे होई जायंट अवामी एक्शन कमेटी दे नेता सरदार अम्मान खान होरें पाकिस्तान पर इस क्षेत्र पर जबरन कब्जा करनेदा दोष लाया। इस दरान यूनाइटेड कश्मीर पीपल्स नेशनल पार्टी नै रावलकोट च झड़प्फें दरान पाकिस्तानी सुरक्षाबलें आसेआ 6 नागरिकें दी कथित तौर पर हत्या दी सख्त निंदा कीती।

<><><><><><>

Hodeout

सुरक्षाबलें इक बड़ी सफलता हासल करदे होई जंदे मंगलवारें राती पुंछ दे सब्जियां जंगलें च चलाए गेदे इक तपाशी अभियान दरान आतंकियें दे छुप्पने दे ठिकाने गी तबाह करी दित्ता। इस दरान उत्थुआं भारी मात्रा च गोला-बरूद बी बरामद होआ। आकाशवाणी जम्मू संवाददाता दी रिपोर्ट मूजब साब्जियां जंगलें च एस.ओ.जी दे नेतृत्व च चलाए गेदे संयुक्त अभियान च पीका मशीन गन दे 246 जींदा कारतूस बरामद कीते गे। इक विशेष सूह थोने मगरा जम्मू-कश्मीर पुलिस दे एसओजी ते सुरक्षाबलें इक सांझे अभियान च साब्जियां जंगलें च तपाशी अभियान शुरू कीता हा।

<><><><><><>

LG-Bhairav

उपराज्यपाल मनोज सिन्हा होरें राजौरी जिला प्रशासन ते जम्मू-कश्मीर दे संस्कृति विभाग गी भारत दी अमूर्त सांस्कृतिक विरासत दी राश्ट्री सूची च ऐतिहासिक भैरव जात्तरा गी शामिल कीते जाने पर बधाई दिती ऐ। इसी राजौरी लेई बड़ी मानै आहली गल्ल दस्सदे होई एल.जी होरें आखेआ जे एहू मान्यता क्षेत्र दी आध्यात्मिक ते सांस्कृतिक जड़ें गी होर मजबूत करोग। उनें आखेआ जे एहू राश्ट्री सम्मान उनें पीढ़ियें दे भक्ते दे यत्नें गी मान्यता दिंदा ऐ

जिनें सदियें थमां इस विरासत गी जींदा रक्खेआ। उपराज्यपाल होरें आखेआ जे भैरव जात्तरा दा इस सांस्कृतिक विरासत च शामिल होने करी राश्ट्री स्तर पर राजौरी दी सगोसार संस्कृति दी पंछान होर निगगर होई जाहगा।

<><><><><><>

India-UNSC Reforms

भारत नै सौहगा कीता ऐ जे संयुक्त राश्ट्र सुरक्षा परिषद च सुधार नेई होने ते वैश्विक संघर्शें दा असरदार हल नेई निकली पाने करी लोकें दा संयुक्त राश्ट्र च विश्वास घट्ट होआ'रदा ऐ। संयुक्त राश्ट्र च भविक्ख आस्तै बहुपक्खवाद गी उपयुक्त बनाने सरबंधी विशे पर मंत्री स्तरीय गोलमेज सम्मेलन च भारत दे स्थाई प्रतिनिधि पी. हरीश होरें आखेआ जे सुरक्षा परिषद च चला'रदे संघर्शें च सार्थक दखल करने च विफल रेई ऐ। हरीश होरें आखेआ जे 80 बरें परानी संयुक्त राश्ट्र संरचना मौजूदा वैश्विक चुनौतिएं कन्नै निब्बड़ने च हुन उपयुक्त नेई रेई रेई ऐ।

<><><><><><>

Weather

भारती मौसम विभाग नै अजज ओडिशा च भारी थमां बड़ी मती भारी बरखा पौने दा रेड अलर्ट जारी कीता ऐ। एह्दे अलावा उत्तर पूर्वी भारत दे बिहाल, पच्छिम बंगाल ते उत्तराखंड च बी कल तगर भारी बरखा पौने दी मेद ऐ। उआं तमिलनाडू, पुदुचेरी ते करायकल च उमस ते गर्मी बधने दे असार न। मौसम विभाग नै दिल्ली, हरियाणा, चंडीगढ़, पंजाब, रायलसीमा ते उत्तर प्रदेश च कल्लै तगरी उमस ते तेज गर्मी पौने दी पेशनगोई कीती ऐ।

<><><><><><>

LG-Yatri Niwas Visit

उपराज्यपाल मनोज सिन्हा होरें अज्ज जम्मू दे भगवती नगर यात्री निवास दौरा लाया ते श्री अमरनाथ जात्तरा पर जाने आहले यात्रुएं गी दित्ती जा'रदियें सुविधाएं दा जायजा लैता। उनें आखेआ जे छड़े 12 दिनें च गै जात्रुएं दी गिनतरी 3 लक्ख शा अगगे बधी गेदी ऐ। उपराज्यपाल होरें आखेआ जे श्रद्धालुएं लेई सुरक्षित ते बिजन कुसा परेशानी दी जात्तरा गी यकीनी बनाना प्रशासन दी प्राथमिकता ऐ। जम्मू-कश्मीर पुलस, सेना, सुरक्षाबलें श्री अमरनाथ जी श्राइन बोर्ड ते सिविल प्रशासन दे अधिकारिएं कन्नै लग्गी दी जायजा मीटिंग दरान एल.जी होरें उंदे आसेआ कीते जा'रदे कम्में दी सराहना कीती ते हर इक जात्रु गी विशेष परौहना समझने दा आग्रह कीता।

FIFA

अज्ज फीफा वलड कप दे दुए सेमीफाइनल च रातीं अर्जेटीना ते इंग्लैंड बश्कार मैच खेड्ढेआ जाह्ग। मैच भारती समें मूजब रातीं साड्डे 12 बजे अमरीका दे अटलांटा स्टेडियम च होग।

<><><><><><>